

DISPUTATIO MEDICO-PHYSICA
DE

Idea Errante
IN
MONSTRORUM
GENERATIONE.

quam
Consensu Gratiorsæ Facultatis Medicæ
addiem XXI. Novembris Anno M DC XCV.
in Auditorio Majori

PRÆSIDE
JO. JAC. STOLTERFOHT,
Philos. & Medic, Doct. & Profess. Publ.

Placide Eruditorum Disquisitioni subjiciet

RESPONDENS
DANIEL GERHARDUS HEISIUS,
SS. Theol. & Philos. Studios.
Stadâ - Bremensis.



GRYPHISWALDIÆ,
Literis DANIELIS BENJAMINIS STARCKII,
Reg. Acad. Typographi.

DISPUTATIO MEDICO-PHYSICA

Idea Eratic

MONSTRORUM
GENERALIUM

Conspectus Generalis Facultatis Medicæ
Universitatis Altorfensis a. 1784

FRASIDR

JOHANN STOLTENHOFF

Philosophiæ Doctor & Medicus
Ordinarius Altorfensis

RECTOR

DANIEL GERSHARDT HELM

Philosophiæ Doctor & Medicus
Ordinarius Altorfensis

ALTDORF

Altdorfensis

DUO infinitæ molis in universo dantur Laboratoria, quorum unum *Natura*, alterum *Artis* est; hæc illius est Ministra, aut, verius dicam, Æmula, quocumq; id tentaverint successu magna seculi nostri ingenia (quorum specimina non sine ingenio collegit *Excell. DN. GEORG. PASCH. amicus & commensalis quondam noster in ædibus CALOVIANIS æstumatissimus, Moral. in Academ. Kiloniens. Professor jam dignissimus*, in *Schediasm. de Curios. hujus seculi inventis*, quorum accuratiori cultui facem prætulit antiquitas) sed ultra sidera non tendit: illa autem est, cujus

- in gremio *DEUS* artes condidit, ut sit,

Usq; quod acquirat, quodq; requirat homo.

ut canit *OWENUS L. III. Epigr. 89.* Officinam suam vel in abditissimis quoq; habet terræ visceribus, nec immanes Oceani incolæ legibus ejusdem refragantur: verbo dicam, præcipuum est, quod in globô Terræ-æquæ apprehenditur, & quo nihil prius in eodem percipere quis potest. Alma hinc est omnium rerum Genitrix, nunquam otiosa, ordinis & operum suorum constantissima Magistra, quæ non fallit, nec sibi relicta fallitur in suo Magisterio. Præcipuam verò vim atq; Majestatem suam in *Homine* tanquam contracto exseruit compendio, ut non esse eundem tumultuarium & incogitatum opus dicas, cum afferente severo illo & persvasorio virtutis strictissimæ Doctore *SENECA* inter maxima rerum suarum natura nihil habeat, quo magis gloriatur, aut certè cui gloriatur. Hinc à tam nobilis machinæ fabrica ad institutum consummanda, nullâ vi externa potest abigi, & quamvis nonnunquam impediatur, non planè tamen deficit, sed antequam nihil agat, *Monstrum* potius format. Hoc quomodo fiat, ab *IDEA* præsertim *ERRANTE*, eâ quâ fieri poterit, concinnitate ac perspicuitate impræsens demonstrare, bono cum *DEO* accingimur.

§. II.

At, cum juxta *CELSI* effatum, in hocce præsertim themate, sermonis pudorem & artis præcepta simul servare, difficile non

modo, sed planè impossibile sit, styli nobis promittimus licentiam, ob veritatis amorem, firmiter credentes, naturam omnem excutere turpitudinis notam, ac de singulis nostris lectoribus dici posse, quod COMICUS de PAMPHILO præsentia CHRYSIDIS nihil commoto, inquit: *spectatum satis putabam*. Severus censor dictum sibi putet illud AUGUSTINI, quod habet *L. XIV. de Civitat. DEI c. XXIII*. *Quisquis ad has literas impudicus accedit, culpam refugiat, non naturam; facta denotet suæ turpitudinis, non verba necessitatis, in quibus facile pudicus & religiosus Lector ignoscat, &c.*

S. III.

Quandoquidem itaq, monente EPICTETO ἡτῶν ὀνομάτων ἐπίσκηψις ἀρχὴ παιδείσεως ἐστίν, communiorē & nos methodum observaturi à nominis exordiemur evolutione, notantes, quod *Monstrum* à *monco* diduxerit BASIL. FABER cum SERVIO in *II. Æneid. n. 680*. quemadmodum à *claudo claustrum* descendit. Alii à *monstrando* ducunt, quasi res monstret eventuras; quibus adstipulatur DONATUS in *IV. Æneid. dicens*; *Monstrum* idcirco existit, ut futurum aliquid monstret; unde CTESIAS GNIDIUS in Persicis asserit, ROXANEM CAMBYSIS uxorem puerum peperisse, capite carentem, cui dicebant Magi, hanc esse Prodigii significationem, nullum Regni Successorem CAMBYSI relictum iri; ac si hisce iræ suæ opus haberet internuntiis omnipotens Numen, nec voluntatem suam aliis posset denunciare signis, quam deformitate, aut hominum cum belluis congressu, *Monstrum* præcedente. vid. RIOLAN. in *Dissert. de Monstr. nat. Lucet. c. VII. à monstrando*. potius dici crediderim, quod ob sui novitatem ac enormitatem quamprimum visa, cum admiratione atq, stupore ab unoquoq, unicuiq, alteri monstretur; idq, vel lucri gratia, ut sæpius fieri docemur, vel etiam, ut quilibet mentis oculorumque aciem convertat in varium naturæ lûsum, novumq, errorem; hinc SENECA *L. VII. Qu. natural. c. I.* inquit: *Naturale est, magis nova, quam magna mirari.*

S. IV.

Sumitur autem variis *Monstri* vocabulum modis *I. Metaphorice* & quidem (α) pro rebus rarò contingentibus; sic CICERO *L. II. Ep. VI. ad Qu. Fr.* inquit: De CÆSARE Monstra promulga-

emulgarunt, i. e. res inauditas (β) *De errato Artificis*, quando v. g. de Pictore dicitur, quod Monstrum pingat, i. e. Picturam deformem, & contra regulas Artis peccantem (γ) *Pro rei excellentiâ*, quando excellentes viros *Sapientie ac Eruditionis monstra* vocamus; ita PETR. CASTELLUS in Ep. quâdam ad PAUL. ZACCHIAM quam habet in *Qu. Medic. Legal. Consil. XXII.* scribit: *Simul cum his te ejus libri Auctorem inter illustres viros librorum exaratores monstrum patefecisti, ab omnibus nosci & monstrari ob excellentiam dignum.* (δ) *Pro astutiâ & calliditate*; hinc TERENCEIUS *Andr. Act. I. Sc. V.* ait: aliquid monstri alunt, i. e. callida foveant consilia (ϵ) *Pro Portento i. Prodigio*, quo sensu MANTUANUS VATES de JULIO canit:

Cum subitum, dictuque oritur mirabile monstrum.

II. In sensu Juridico, quo is solummodo dicitur *partus monstrosus* qualem visu vel vagitu novum, non humanæ figuræ, sed alterius magis animalis quam hominis partum mulier enixa est, uti describitur *L. 135. ff. de Verb. signific.* de quo quærit JCtus, an sit alienus? an Testamentum rumpat? an sit inter liberos computandus? an jure Parentibus succedat? &c. &c. vid. PETR. REBUFF. in *l. 38. ff. de Verb. signific.* Unde nec Hermaphroditas, nec Bicipites, aut Bicorporeos, vel equinis pedibus natos in Jure monstrosos esse partus, sed eos demum, qui bruti magis quam hominis forma apparent, docet PAUL. ZACCH. *Qu. Medic-Legal. L. VII. Tit. I. Qu. I.* III. *Physicè*, & quidem (ζ) nimis latè pro omni eo, quod est contra naturam, v. g. quod Evnuchus vitiet virginitatem; unde DORIAS apud TERENCEIUM: *An obsecro mea Pythias, quid istucnam monstri fuit?* (η) *strictius* quidem, sed (α) *impropriè*, quando v. g. animantia unius naturæ in suo genere perfectam constitutionem habentes, ex scœmina diversæ admodum speciei enascuntur, Rana v. g. vel serpens ex mulieris utero exiens, id quod à semine corrupto ac putri menstruo fieri putat RIOLANUS *l. c. c. 3.* (ita ut ex mala sive sua, sive uteri qualitate in materiam abeat, ex qua varii generis insecta, sponte nascantur, quod ex PARÆO *L. XIX. c. 3.* experimento certissimo comprobatum putat LICETUS *de Monstror. causis. Natur. & different. L. II. c. 3. p. 63.*) cujus autem rei causam sanæ rationi conformem infra sup-

peditabimus. (β) Pro iis, quæ monstruosam quidem habere possunt
 Originem, at simpliciter visa intuentium mentes in admirationem
 non rapiunt, v. g. puellus albus ex Æthiope genitus, & vice versa.
 (γ) Pro iis, quæ dissimilium quidem specierum membra obtinent,
 sed ex parentibus sibi consimilibus oriuntur, quales vivere dicun-
 tur homines in Africa, Monoculi, v. g. Acephali, unipedes, aut
 sine naribus, æquali totius oris Planitie, superiore labro orbi,
 sine lingvis, &c. &c. quorum mentionem facit PLINIUS H. N.
 L. VI. c. 30. & L. VII. c. 1. (δ) Pro iis, quæ parvo excessu à Paren-
 tum natura degenerant, ut gibbi homines, claudi &c. (ε) *strictis-*
simè atque propriè sumitur de animantibus cum insigni deformitate
 ac structurâ planè inusitatâ, genitoribus suis valdè dissimili & rarò
 contingente, qualia ARISTOTELES recenset IV. de Generat.
 Animal. & eliciuntur ex ipsismet textûs verbis in L. Non sunt
 Liberi ff. de statu hominis.

§. V.

In tali sensu monstra Græcis dicuntur τέρατα σημεῖα; τέρας
 autem exponit EUSTATHIUS τὸ παντελὲς παρὰ φύσιν σύμ-
 βαινα, ut sit tanquam παρέκβασις naturæ: βάσματα item. Τη-
 ρώματα, ἀλλομύθηα &c. &c. Latini vocabulum exprimunt per
 Foetum monstruosum, iratâ naturâ genitum, mirifica corpora, mon-
 strofa germina, terribiles visu formas, item Ostenta, Portenta, Pro-
 digia; quamvis, si propria attendatur significatio multum inter
 se voces differant: nam AMBROS. PARÆUS in Præfat. Oper.
 inquit: *Quæcunq; contra communem naturæ ordinem & legem sunt,*
monstra vocamus; ita monstruosum dicimus infantem, qui unico cum
brachio, vel qui biceps in lucem prodierit. Prodigia verò definimus
ea, quæ contra omnem naturæ normam eveniunt, à naturâ nempe planè
aliena & abhorrentia, quemadmodum si ex muliere angvis aut canis
nascatur. Accuratiorem autem differentiam inter Ostenta, Portenta,
 Prodigia & Monstra ex FRIEDER. NAUSEA L. II. mirabil. c. 5.
 & BLOND. L. I. edocet PETR. REBUFF. ad d. l. de Verb. signif.
 quod nempe Portentum licet naturale sit, rarò tamen se ostendat,
 & futurum aliquid cum temporis intervallo denuntiet, cuiusmodi
 sunt Cometæ; Prodigium, quod etsi naturaliter fiat, & sæpè eve-
 niat, aliquid mali tamen semper præfagiat: Monstrum autem sit,
 quod

quod contra naturam fiat, ut cum quid nascitur membris alterius generis: addit idem quod Iustus tamen omnia vocet *Ostenta*, quod futurum aliquid ostendant: ab *ostentatione* autem novæ & incon-
suetæ formæ sic dicta putat GODDÆUS ad d. l. hæc cum distin-
ctione, ut quoties *Monstrum* & *Ostentum* ad rem inanimatam, ad
spectrum, ad imaginationem quandam, ad miraculum rei inani-
matæ reducuntur, à nativâ significatione recessisse dicendum sit:
& viceversa, si *Prodigium* & *Portentum* ad *Ostentum* animatum,
veluti ad Androginum vel Cynocephalum, aut Minotaurum refe-
ratur, à nativâ significandi ad tropicam declinasse putetur. Indif-
ferenter verò vocabulis hisce usos fuisse veteres testatur ALCIA-
TUS ad d. l. ita enim VIRGILIUS L. IX. *Æneid.* inquit *Trojanos*
hec Monstra petant, &c. & PLAUT. in *Asinar.* Act. II. sc. II. dicit:

Pro monstro extemplo est, quando qui sudat, tremit.

Ubi pro signo indicante fumitur. QVINTIL. L. I. c. 1. corpus
prodigiosum pro *Monstro* & c. 10. sub fin. *Prodigium* divinitus
factum pro *Portento* ponit. Hebræi per מופת terminum expri-
munt, nam הורר מופת virum dicunt, qui est, quasi *Monstrum*
five *miraculum seculi sui*: כמות היות לרבים sicut *prodigium*
fui multis, five Ich bin für vielen wie eth Wunder. Regius Pro-
pheta inquit Ps. LXXI. 7. Germanicè vocantur Miß-Geburten /
seltsame Geburten / Unmenschen / Abenteuer / &c.

Variè describitur ab Authoribus: ARISTOTELES omnem
conceptum, qui præter naturam fit, monstruosum vocat II. *Phys.* 5.
& L. IV. de *Generat. Animal.* c. 4. *Monstrum* vult esse conceptum
vitiosum, & præter naturæ intentionem procreatum; unde II.
Phys. c. 8. ἀναρπύματα τῆς φύσεως peccatum naturæ idem vocat:
cui adstipulatur WEINRICH. L. de *Ort. Monstror.* dum *Monstrum*
dicit esse naturæ erratum ab eò fine quem sibi in agendo proposuit.
LICETUS l. c. c. 11. p. 41. illud describit, quod fit subcœleste
vivens, membrorum enormi constitutione, videntibus horrorem
cum admiratione incutiens, rarò admodum nascens, ex secunda-
rio naturæ instituto genitum, propter aliquod impedimentum in
principiis, suæ conformationis: HIERONYM. CAPIVAC. L. IV.
c. 6. *Monstrum* vult esse animal in utero genitum à depravatâ
formati-

formatione: cui autem descriptioni sese opponit PAUL. ZACHIAS *Quest. Medic. Legal. L. VII. Tit. qu. 1. n. 24.* cum admodum raro & depravatâ formatione *Monstrum* fieri putet, utpote quæ format pro materiâ substratâ: at, quo jure hoc assertum tam mordicus teneat hic vir alias de re Medicâ optimè meritis, ex infra dicendis patebit fufius. Putat verò l. c. n. 26. melius describi posse per animal ita genitum, ut à Naturæ bonitate, & simplicitate suæ speciei conveniente enormiter recedat. Nostrium quamvis non sit omnes hasce definitiones juxta Logicorum examinare rigorem, non possumus tamen non approbare illam SPERLINGII, *Monstrum* definientis, quod sit effectus naturalis cum insigni deformitate à causâ deficiente & aberrante productus. *instu. Physic. c. IX. p. 207.* Hanc autem causam cum non apposuerit, magis explicitè, eamque veram atque formalem addimus, dicendo, quod *Monstrum sit effectus naturalis cum insigni deformitate ab IDEA ERRANTE productus,*

§. VII.

Loco Generis stare potest *effectus naturalis*, quamvis depravatus & à perfectione naturali discedens: nullis enim limitibus naturæ cingitur Laboratorium, ex quo singula vitam trahere coguntur, & ad quod cuncta quoque revocat; rebus minimis quoque & abjectissimis leges scripsit perpetuæ observantiæ: irrationalis quidem est, agit tamen semper cum ratione, nisi impediatur, quia dirigitur à sapientissimo moderatore, nempe DEO, cujus est ministra; unicuique causæ ille propriam vim ab initio ingenuit, à quâ ordinate, & magna cum ratione fiunt hic omnia, ut optimè docet RIOLAN *in Diss. de de Monstr. nat. Lutetia c. 2.* nihil proinde temerè ac frustra agit, certum semper intendit finem, eumque summæ perfectionis, ita ut nihil desit aut superabundet eorum, quæ sunt ad opus producendum necessaria; hoc fine si cadat, externa aliquavi impedita, non desistit ab opere, sed provirtutis impellentis, aut potius impedientis efficacia, lubenter quasi peccat: hinc *Monstrum* GADDIUS *ad. d. l. de verb. signific. Ostentum* esse dictum asserit, quia natura in eo se ostendit efficacem, at Peccantem in excessu vel defectu. Quamvis itaque hominum intuitu, qui causas ignorant, vel invenire nequeunt, quædam docendi gratia ad fortunam

fortunam referantur, ac fortuito accidere dicantur, juxta illū *Eloquentie Romane Principem L. II. de Divin.* Philosopho tamen indignum est putare, quicquam sine naturali causa, quam ignorat, esse, vel in rerum natura existere. Hinc non videmus quo jure MERCATUS *L. III. de steril. & pregn. aff. c. 7.* Monstra dixerit esse, quæ contra naturam fiunt; cum quidem sint contra ejus institutum, ab ipsa tamen suum habeant esse: nam habetur naturæ actio, licet vitiosa; format virtus, licet pravè formet, adest materia, licet vitiosa, inquit B. SPERLING. *l. c. p. 212. in fin.*

§. VIII.

Differentiam in Definitione allata, petimus à Deformitate, & quidem insigni, quo excludantur minus notabiles defectus, v. g. ii qui Parentibus non sunt similes, & *Monstra* quodammodo vocantur ab ARISTOT. *L. IV. de Generat. Animal. c. 3.* v. g. Gibbus, nasus aduncus, pes brevis, &c. cum non quilibet error & recessus à naturæ bonitate *Monstri* nomen propriè mereatur, sed qui fit cum insigni deformitate v. g. homines polycephali, vel partibus alienæ speciei præditi, cujus sortis erat SIFRIDUS VITULUS, capite, cornubus ac pedibus perfectè vitulinis, sed ratione humanâ præditus: conventualis enim erat in monasterio B. V. Mariæ Eberacensi ubi A. M. CCC. XV. totum codicem sacrum latino idiomate propriis suis monstrosis descripsit manibus, cujus authenticum exemplar ante aliquot menses in famigeratissima Bibliotheca Wolfenbüttelensi, nobis videndum exhibebatur. Plura qui nosse desiderat, petat SCHOTTI *L. V. Physic. curios.* & alios quos ibidem citat Authores.

§. IX.

Hujus farinæ *Monstra* cum ferè infinita dentur in rerum natura, *differentias* eorundem *specificas* certis includere cancellis non possumus. RODERIC. à CASTRO *L. III. de Morb. Mulier. c. 6.* ad quinque ea refert Classes, quarum *Ima* secundum naturam est, comprehendens omnes illas Nationes, quæ defectu aliquo insigniuntur, ut Gentes caudatæ, capite canino præditæ &c. quas autem à Monstrorum serie eximimus §. 4. *Ilda* in quantitate peccat, secundum totum, & quidem vel in excessu, ut gigantes, vel in defectu,

ut pumiliones. *Illia* est illorum, quæ vel membro aliquo sunt mutilata, aut eodem abundant. *Ivia* ea complectitur, quæ partim humano sunt corpore, una tamen vel pluribus particulis bruti speciem habent. *Via* eorum est corporum, quæ bruti alicujus ex toto, vel mixtim plurium speciem ac figuram repræsentant. Conf BAUHIN. de Hermaphr. L. I. c. 15. PAUL. ZACCH. l. c. fol. 371. seqq. LUDOVIC. MERCAT. l. c. Tria in Monstro observat LICE-TUS l. c. L. I. c. 13. penes quæ in varias partiri potest species, Materiam proximam, locum originis, & formam essentialem. *Ima* divisio est in tria suprema Genera, quæ sunt, Monstrum vegetativum, sensitivum & intellectivum, cum totidem sint subcœlestium viventium supremæ species, plantæ, animal brutum, & homo. *Ilda* est in utero & extra eundem natorum. *Ultia* ipsi præcipua est & scientifica, cum sit actus, qui separat & distinguit juxta ARISTOT. VII. Metaphys. T. 49. potissimumque actus essentialis specificas differentias constituat: cum autem essentialis *Monstrorum* forma sit vitata, & exinde mira membrorum corporis oriatur compositio, penes eandem dividit porrò *Monstrum* in *Uniforme* & *multiforme*. At, cum intentio nostra non sit, *Monstrorum* adornare historiam; in analogis nobis sufficere poterit, notitiam habere de præcipuo, in quo cætera omnia virtute dignoscuntur, *Monstri* naturam in genere humano, ut rerum omnium mensura, in cujusque origine Theoria reliquorum viventium aptè continetur, potissimum delibabimus, unde pro hacce nostra intentione cum RIOLANO dicimus, quod *Monstrum* aliud sit secundum speciem, aliud in individuo.

S: X.

Prioris unica tantum datur causa naturalis, dum diversæ speciei animalia coeunt, ut ex commistione diversorum seminum *monstrum* nascatur biforme, homo v. g. capite vitulino, & viceversa, aut capite homo, reliquo corpore canis &c. quamvis non desint, qui ejusmodi diversorum seminum commixtionem ad conceptionis, nedum generationis opus absolvendum, plane ineptam censent, dicendo, quod unum eorundem ob maximam disconvenientiam alterum necessario destruat, aut in utriusque generantis semine prolifico insita *idea* specialiter non saltim, sed & individualiter differat.

rat, ac proinde non possit ita uniri, ut mediante conceptione exinde emergat tertium: verum cum ex diversis brutorum speciebus, perfectum fieri conceptum quotidiana doceat experientia, quidni brutum ab homine, & viceversa, conciperet? in utroque enim datur naturalis coeundi stimulus, virtusque uteri attractiva est eadem, unde eodem modo seminum fieri commixtionem ac *Idearum* evolutionem, concludere possumus: ac si vera sunt omnia, quæ referunt annales, ita *Ideam* seminalem hominis sapè prævalere crederemus, quod formosissimæ quoque puellæ ex Equabus & Asinabus fuerint exclusæ, cujus detestandæ sceleratorum hominum & brutorum commixtionis exemplum refert FORTUN. LICET. l. c. L. II. c. 68. Conf. BARTHOLIN. *Centur. V. Histor. 87.* Memoratu dignum est, quod bini Uplalienses Episcopi JOHANNES & OLAUS MAGNUS in *Histor. Septentr.* cum SAXONE GRAMMATICO L. X. *Histor. Danic.* referunt, puellam in Svecia ab urso esse raptam, & constupratam, ita ut mox ferino concubitu gestasse utero, & masculum infantem pilosum, membris tamen humanis, partum ediderit, eundemque à Patre URSUM nominaverit. Ab hoc genitum esse dicunt DRUGILLUM SPARCHELOTT, Ducem sine pari, qui postea ULFONIS Regis Daniæ Pater factus est. JOH. BARRUS dicit, constanti traditione in Regno Pegu asseri, eam nationem ducere originem à cane cum puellâ naufragâ. Sit fides penes Authorem; interim eousque processit dira hominum ad hunc usque diem malitia, ut execrandam libidinis flammam in abominando sæpius extingvant puteo; ut proinde sceminam, quæ Monstrum brutis simile generat, nunquam esse ab omni suspitione liberam, sed nefandi criminis ream fieri suspectam, dicat PAUL. ZACCHIAS *Qu. M. L. consil. XXII.*

§. XI.

Monstri secundum individuum causa partim Metaphysica est, sive præternaturalis, partim Physica sive naturalis. Illa potest esse I. DEUS T. O. M. qui sicut lac nos fudit, & sicut caseum coagulare fecit, Job. X. 9. supernaturaliter ac eminenter concurrens cum omnibus agentibus infra se positis, ad quorumlibet effectus producendos, juxta ARISTOT. L. I. Cæl. c. 9. cumque sit naturæ Dominus,

illa eidem quoque obtemperat, ut divini Spiritus vi rapta à solita lege deflectat; cujus consilii abditissimas habet rationes, easque partim ob delicta hominum, quorum exempla refert SCHOTT. in *Phys. curios. L. V. c. 29.* partim ut glorificetur nomen ejus sanctissimum, quod ipse Salvator *Johan. IX. 3.* exemplo cæci testatur.

II. *Malus Genius*, non quidem sub specie incubi, aut succubi monstra verè generans, cum sit spiritus, & per consequens semine prolifico destitutus; quamvis autè juxta mentem MARTIN. DELRIO *Disquisit. Magic. L. II. Qv. 15.* SCHOTT. *l. c. L. I. c. 22. conclus. 1.* SPRENGER. *Mall. Malef. §. 2. Qv. I. c. 4. &c.* possit semen aliunde acceptum deferre, & quâ est agilitate, & rerum naturalium peritiâ, calorem seminalem continere, particulam tamen prolificam, eundem adeò conservare posse, multis argumentis negat JOH. BAPT. DE LAMZWEERDE in *Hist. Natural. Molar. Uteri, c. 22.* Quadrant huc verba CYRILII *anthropomorph L. I. c. 17.* quæ citat “VOETIUS *T. I. Disput. p. 938.* Stultum est existimare Dæmones “incorporeos corporis munia exsequi posse, quodque à natura “sua alienum est, efficere. Neque enim quicquam eorum, quæ “in rerum natura existunt, aliquid præter suam naturam præstare “potest, sed unum quodque ut factum est, ita manet suum cuius “munus, præscribente DEO: Ipse enim est Author ac Dominus “omnium Ortus, cujus nutu atque arbitrio, unum quodque eorum. “quæ sunt, est id, quod est. Interim tamen ex permissione DEI ad Monstrorum generationem concurrere potest, Phantasie Matris horriferas species objiciendo, ad cujus ideam facultas, ut vocant, formatrix in subjectum agit, eidemque formam ab ideâ seminali toto cælo differentem, horridam, atque monstrosam imprimit: & quemadmodum res varias atque ridiculas artificiose callet muliercularum immittere Utero, ut refert JOH. CHRISTIAN FROMMANN. *Tr. de Fascinat. L. III. P. IV. sect. 1. c. 10.* sic & posse eundem foetum diabolicum fingere, ex eâ quis colligere posset historiâ, quam refert ex STROZII CICOGNÆ *Theatr. Univers. natur. P. I. L. III. c. 2.* KORNMANN. *de Miracul. Mortuor. P. IV. c. 18.* & quam ex BOETH. *L. IX. Histor. Scot.* recitat HIERONYM. CARDANUS *L. XVI. de Rer. Variet. c. 94.* Conf. SIMON MAJOL. *Dier. Canicular. Coll. II. p. 71. seqq.* SCHOTT. *l. c. c. 21. 22.*

VOET,

VOET. *Disp. Select. P. I. de Natur. & Operat. Demon. p. 36. 37.*
Cujus autem rei difficultate perplexus BERNHARDUS *Serm. V. super Cant.* postquam antea examinare tentaverat, quomodo Spiritus corpora assumere possint, inquit : *nolo hoc ut à me requiratis, videntur Patres de hujusmodi re diversa sensisse, & nescire me fateor.* Connexionem horum verborum habet LAMZWEERDE *l. c. p. 202.* Ne dicam quod vel ipsis concedentibus Theologis nostris infantem aliunde possit suffurari, & partu sive vero vel falso laboranti supponere, aut etiam seipsum sub specie infantis suscipiendum exhibere : de quâ materiâ præter alios vid. JOH. VALENT. MERBIZ. *Disf. de Infant. suppositit. vulgo Wechsel-Bälgen.*

§. XII.

Sub *causæ naturalis* classe opinionum diversitate nostri militante Doctores, dum alii eandem cælum esse dicunt, motu suo perenni & luminis opera physicè res subcœlestes gubernante, juxta ARIST. *I. Meteor. c. 2.* quemadmodum enim aër variè afficitur à radiis cœlestibus, ita ut modo tenuis, modo serenus, pellucidus, modo humidus, crassus, opacus, vel nebulosus sit, ita materiam seminalem varias subire vicissitudines, non solum vi uteri varie affecti, sed etiam ex mutatione ab Astris inducta, ajunt : in quantum autem id valeat, docet JOH. MARCUS MARCI à KRONLAND in *Philosoph. Veter. restit. P. II. S. 45.* alii Uteri tortuositatem inter Monstrorum numerant causas, quam tamen conceptum potius impedire, quam *Monstrum* formare ostendunt PAUL. ZACCH. *l. c. fol. 575.* & WEINRICH *de Ort. Monstr. c. 12.* alii vitiosam seminis qualitatem in crassitie & fluiditate non bene proportionatis consistentem accusant, dum putant virtutem genitalem ac formatricem in crassiore spermate ita obrui, ut formationi fœtus minus conducatur ; in fluidiori v. ossa, nervos, venas, arterias, aliasque solidiores partes non posse formari : diceremus autem potius quod vitiosa ejusmodi seminis qualitas sterilitatem magis inferre queat, aut conceptionem impedire, quam ut partes monstruosæ fœtus exinde formentur.

§. XIII.

Si *Monstrorum* spectamus varietatem, causarumque quas iisdem philosophantium multitudo assignat, numerum, vela potius contrahimus

trahimus, quam temporis ac spatii supergrediamur limites, recensendo singulas, quas tamen *ad materiam & formam* brevitatis studentes referunt nonnulli; ita ex materiae defectu, non quidem cuiuscunq; sed illius determinate, quæ illarum partium constitutioni propriè à natura est dicata, mutilari fœtum; ex abundantia autem partes embryonis in natura excedere: aliquando autem naturam instituere in utero geminorum procreationem, eamq; aggressam, ubi formatis quibusdam partibus materiam postea sufficientem non habeat, pro duplici corpore formando, seu sit in Utero consumpta, sive ad ipsum aliqua ex causa non pervenerit, quod vellet, efficere non valentem, efficere quod potest, residuum materiae in unius corporis formam gemellorum partibus non plane formatis adjungere, ac *Monstrum* excedens constituere, ob defectum materiae generationi primario intentæ à natura, & jam inchoatæ, vult maximi ingenii vir LICE TUS l. c. c. 13. Verum cum materia sibi relicta jaceat iners, ut res ad omnia sit parata, cessatura, si non moveatur, pro principio quidem, sed purè passivo eandem accipimus; cum hoc non pariat exquisitam thematis propositi scientiam, ejusq; conditio tanto sit inferior, quanto *forma* in agendo potentior, indolem hujus pro decidenda lite brevibus considerandam assumimus.

S. XIV.

Præsupponimus itaq; non omne illud quod subspecie seminis sensorium visus occupat, verum esse semen, sed habere sese tantummodo instar vehiculi aut involucris partis nimium fluidæ, nec terminis suis circumscriptæ: minimè enim attendendum esse ad externam aliquam corporis seminalis figuram, sed illud revera semen esse, quo per modum generationis corpus aliquod producitur, non quidem ut ex materia, sed ut ex motus efficiente principio, præcipit COSMOPOLITA *Hyst. Natural.* p. 18. Hinc optimè SEVERINUS semen vocat vitale principium in se continens spiritus mechanicos & tincturas Universæ Anatomix propriæ speciei, quibus suum sibi fabricant corpus, colores, sapes, qualitates, magnitudines, figuras, & reliqua officiis consentanea. Sive itaq; excrementum tertiæ concoctionis, cum ARISTOTELE, sive medullæ spinalis defluxum cum PLATONE, sive cerebri portiuncu-
lam

lam cum ALCMÆONE, five crudiorē liqvore chylōsum,
cum GLYSSONIO, CHARLEONE, WARTHONE & aliis, five
humoris lymphatici materiā cum BILSIO, five subtilissimū
seri florem, cum *Excell. Dn. D. WEDELIO*, aut subtiliorem san-
guinis arteriosi materiā ad testes delatā, cum plerisq; seculi no-
stri Anatomicis, five partē tantummodo ejus crudiorē atqve
chylōsam, partē aqvosa dilutā, & cum sanguine per Arterias
spermaticas ad testes delatā cum B. D. ETMULLERO, idē
dixeris, illa tamen substantia qvæ corpore ejus constituit, qvocunq;
superbiat titulo, aut baptizetur nomine, mentis acie potius est con-
templanda, unde omne generans generet sibi simile, juxta HORA-
TII: L. IV. Od. 4.

Fortes creantur fortibus & bonis

Est in juvenis, est in equis Patrum

Virtus: nec imbellem feroces

Progenerant aquila columbam

J. XV.

Vera hinc prædicat FRANC. OSWALD. GREMBS. L. I.
Arbor. integr. & ruinos. homin. c. 7. J. 1. n. 30. p. 33. qvōd omne
semen sine imagine sit infœcundum, & imago illa in se gerere
debeat similitudinē Iconis concipiendæ, qvam *Ideæ* vocabulo post
PLATONEM nostri hodie exprimunt Doctores: hæc qvid sit
“interroganti respondemus cum SENECA *Ep. 58.* Propria Pla-
“tonis suppellex est: *Ideas* vocat ex qvibus omnia, qvæcunqve
“videmus fiunt, & ad qvas cuncta formantur. Hæ immortales,
“immutabiles, inviolabiles sunt. Qvid sit *Idea*, i. e. qvid PLA-
“TONI esse videatur, audi. *Idea* est eorum, qvæ naturā fiunt, exem-
“plar æternum. Adjiciam definitioni interpretationem, qvo tibi
“res apertior fiat. Volo imaginem tuam facere, exemplar picturæ
“te habeo, ex qvo capit aliquem habitum mens, qvem operi suo
“imponat. Ita illa qvæ me docet & instruit facies, à qvâ petitur
“imitatio, *Idea* est. Talia ergo exemplaria infinita habet natura
“rerum, hominum, piscium, arborum, ad qvæ, qvōdcunqve fieri
“ab illa debet, exprimitur. Natura itaqve ipsi *Ideans* est, qvæ
habet *Ideas* sibi coætaneas, juxta qvas cuncta subcœlestia naturalia
format, singulisq; *Ideam* adæqvātā imprimit, qvam impressam de-
“inceps

"inceps *עִדֹּן* vocat : ita enim ille quid sit *עִדֹּן* inquit : l. c. atten-
 "das oportet, & PLATONI imputes, non mihi, hanc rerum diffi-
 "cultatem. Nulla est autem sine difficultate subtilitas. Paulò
 "ante Pictoris imagine utebar, ille cum reddere VIRGILIUM
 "coloribus vellet, ipsum intuebatur : *Idea* erat VIRGILII facies,
 "futuri operis exemplar : ex hac quod Artifex trahit, & operi suo
 "imposuit, *עִדֹּן* est. Quid intersit quæris ? alterum exemplar
 "est, alterum forma ab exemplari sumpta, & operi imposita.
 "Alterum Artifex imitatur, alterum facit. Habet aliquam faciem
 "exemplar ipsum, quod intuens opifex statuam figuravit : hæc
 "*Idea* est, etiamnum aliam desideras distinctionem ? *Idos* in opere
 "est ; *Idea* extra opus : nec tantum extra opus est, sed ante opus.

§. XVI.

Hancce *Ideam* Universalem *Platonicam* interpretamur
 Christiani per vim illam sese multiplicandi seminalem virtute
 verbi benedictionis omnibus rebus creatis insitam, statim enim
 post illud פָּרוּ וּרְבוּ וּמְלֵאוּ אֶת־הָאָרֶץ *Genes. 1. 28.* וְ
 תִרְשָׁא הָאָרֶץ דָּשָׁא עֵשֶׂב מְרֹעַ וְרֵעַ עֵץ פֶּרִי עֵשָׂה פֶּרִי
 : לְמִינֵהוּ אֲשֶׁר וְרֵעוּ בָרַעַל־הָאָרֶץ *v. 11.* factum est, ut cuncta
 in circulum quasi redirent, mediante illa feminali *Idea*, posteris in
 infinitum quasi communicanda, quæ idcirco singulis non inest ea-
 dem, sed quælibet species in producendo sui generis individuo,
 specificum à cæterarum specierum omnium semine, distinctum
 semen possidet, ut eruditè ex MARCO MARCI *de Ideis Idear,*
operatricib. docet DAVID van der Beeke *in experim. & medit. circa*
natural. rer. princip. L. II. quod adeò exactè in se continet *Ideam*
 & imaginem rei producendæ, ita ut tota ista five hominis sit, five
 Elephantis aut cujascunq; animalis delineatio, æq; sine confusione
 possit contineri in exigua seminis Bulla, testiumq; meatus ingredi,
 iisque egredi, ac imagines maximorum objectorum in pupillam
 oculi ingrediuntur perfectè, cum omnibus suis partibus, quæ in
 fundo sensim sine sensu in sensibilem latitudinem extenduntur,
 docente JOH. BAPT. DE LAMZWEERDE *Natural. Molar. uter.*
Histor. c. 5. p. 54. Hinc fieri videmus, quod omne generans
 generet sibi simile, ac semini hominis v. g. nulla inesse possit pro-
 ducendi

ducendi canem, aut aliud animal, potentia, sed solum hominem, cujus *Idea* involucro visibili externo involvitur.

§. XVII.

Origo *Virtutis* hujus *Idealis*, non parva Eruditorum hætenus vexavit ingenia, dum nonnulli à cœlo eandem infundi dicunt, quo exinde harmoniam Microcosmi cum Macrocosmo probent: HELMONTIUS ex splene oriri ac deinceps ad stomachum Duumviratus socium, hincque adeò facile ac primordialiter (in altero sexu) ad uterum vult distendi *Tr. de Concept. fol. 370.* Alii verò sangvinem menstruum sigillationem hancce in jecore accipere, tanquam ab opifice materiam particularium membrorum & commodum respiciente, ideoq; talem sangvinem generante, quo possit homo nutriri, non aliud animal. Vid. RODERIC. A CASTRO *L. III. de Morb. Mulier. c. 9.* Dixerim potius cum DAVIDE van der Beeke / MARCO MARCI & aliis spectatæ satis famæ viris, quod decerpatur quasi ab omnibus & singulis corporis partibus, cum nulla earum reperiri possit, cujus non integra *Idea* & signatura in semine contineatur; id quod videmus in iis, qui Parentum nævos non animi saltim, sed & corporis, hæreditario quasi possident jure. Conf. *Excell. DN. D. WEDELII Dissert. de Nævis Maternis.*

§. XVIII.

Vis formatrix hujus *Ideæ* unde dependeat, quærere jam ulterius, litemq; examinatis plurimorum sententiis, decidere possemus, nisi thematis propositi ratio in *Ideæ* errorem potius, quam ejus causam inquirere nos juberet; tribus hinc saltem, quod dicitur, verbis notamus tritam Peripatheticorum opinionem, quæ Solem & hominem generare hominem asserunt, hæc adducti ratione, quod in Generationis Mysterio præter maris & foeminæ calorem, requiratur externa quædam, eaqve principalior ac efficacior causa, quam sub nomine virtutis plasticæ, aut facultatis formatricis philosophantium describit vulgus: verum hanc descriptionem pro terminis nihil lucis ad rerum naturalium explicationem afferentibus, æstimat JOH. BAPT. DE LAMZWEERDE *l. c. c. 25.* dicens, quod per Solis in generatione humanâ influxum nihil aliud intelligi possit, quam ipsissimus *primi elementi Cartesiani*, sive subtilissimæ materiæ transfluxus, à quo omnis omnium corporum sublunarium activitas & effi-

cacia dependeat, qvi autem transfluxus non ex qvâlibet materia qvâlibet promiscuè, sed ex determinata certa producat corpora, cum sit alligatus legibus, quas in singulis corporum naturis, qvoad insensibilium particularum figuram, motum & ordinem earumq; pororum interstitia insculptos invenit, ut proinde non possit aliam corporis speciem ex materia elaboranda producere, quam in minimis particularum texturis descripta est.

§. XIX.

Sed remotius hoc formatricis virtutis foret principium, cum propius concurrat *Archeus*, foecundus motor, Solisq; filius (si titulum huncce jure suo ab HELMONTIO meretur) cujus existentiam & indolem à deliramentis Helmontianis vindicatam, in *Disfert. de Morb. Idealib.* felicissimo illo ingenii foecundissimi partu, elegantistyle declarat *Excell. DN. D. JOH. GERDESIUS*, olim *Præceptor* atqve *Hospes*, jam verò *Collega* ac *Fautor* noster *omni honoris ac officii genere colendus*: qvi cum in Oceano sanguinis tanquam appropriato hospitet vehiculo, cumq; eo ad abditissimos corporis feratur recessus, non potest non perfectam minimorum formare *Ideam*, eamq; ad Meditullium deportare cerebri (si certa ei assignanda sedes) unde per Spiritus, ut vocant Genitales, tanquam fidelissimos satellites ablegat eandem ad testiculos, usqve dum magna comitante caterva fertili inferatur arvo, ubi ulteriorem exspectat evolutionem, quæ vel minutissimas sæpius, ut diximus, corporis, cujus *Idea* est, detegit maculas: cumq; hoc ita sese habeat, cujuscunq; partis specialem in sese continebit *Ideam*, ita ut alia sit quæ brachium, alia quæ ventrem, alia quæ pedem aut cerebrum, &c. constituit; quæ membra suo quoque ordinat loco fabricator *Archeus*, nunquam à proposito, sibi relictus, declinans, ut qualis *Idea*, talis etiam sit *Idos*, nisi alia, vel in ipso generationis, aut copulæ carnalis puncto, menti sese repræsentet aut sensibus, imago, cujus *Ideam* Spiritus, qvi nunquam magis negotiosi sunt, quam in Generationis functione, pro potestate illa, quâ pollent, in totius corporis humores, *Idea* jam evolvendæ imprimunt, ut à perfectione pristina recedendo, characteres *Idee* conceptæ sibi imprimi patiatur.

§. XX.

Nunquam autem adeò à pristinâ aberrat formâ, qvin eam, quamvis

quamvis pro ratione *Idea* phantastica nonnihil mutata, servet, quicquid dicant illi, qui semen putant mala sua sive Uteri qualitate in materiam posse abire, ex quâ varii generis insecta sponte nascantur; licet enim haud raro accidat, quod Mulier vermiculos, ranas, aut mures utero excludat, non tamen hoc semini adeo temere tribuerem muliebri, quam *Idea* rei præternaturaliter exclusæ seminali, quam vario modo cum esculentis diglutire possunt pauperculæ, ut nescio quid ridiculi pariant. Quis enim novi entis productionem actui tribueret putrefactionis, cum ejus beneficio per accidens potius sopitæ rerum *Idea* in Generationis actum prorumpant? nam haud secus ac animalia, ut vocant, perfectæ, speciali sua gaudent *Idea* seminali, ita vel subjectissima quoque reptilia principium agnoscunt homogeneous; illorum autem semina per multos annos illæsa posse subsistere, lignorum docent teredines & vestium tineæ, nec minus caseorum vermiculi, quorum *Idea* tamdiu quasi ligantur, usque dum accedente putrefactione ab incarcerationis liberantur vinculo: cujus modum fusius describit LAMZWEERDE *l. c. c. 25*. Murium autem & Glirium generationi in Utero muliebri majorem subesse difficultatem multi credunt, at, qui mirandam horum novit fecunditatem, quâ brevissimo tempore in tantum excrescunt numerum, ut integras devastare possint Provincias, (conf. *Ephem. Medico-Physic. Germanic. Decur. II. A. v. Obs. CX*) facile concludere potest, quod exiguo indigeant adminiculorum ad sui generationem apparatu, ita ut naturæ curiosi observent, quod & mures recenter nati novam sæpius in Utero gestent sobolem, æque ac ovum ovo imprægnatur, quale & nos in Museo inter reliqua curiosa naturalia possidemus. His præsuppositis judicamus, quod hæcce animalcula in frumento aut farina sæpius coeuntes, facile inibi effundere possint semen, cujus *Idealis virtus* multo viscidior ac in nobilioribus animantibus, diu fecunda manet usque; dum cum pane commesto de novo in ventriculo separatur à substantia farinacea, & cum chylo ad sanguinem, cumque eo deinceps per vasa præparantia, aut, ut vult LAMZWEERDE, per vascula hiantia, in Uterum deferatur, ubi beneficio caloris à compedibus liberatur, perfectamque acquirit evolutionem. Si à semine muliebri in Utero putrefactio haberent originem hæcce animalcula,

malcula, nunquam generatio eorum in visceribus masculorum fieret, quod tamen hic *Gryphiswaldia* experti sumus, cum anno superiori d. 2. Martii à puero trium annorum Ventris tormina sentiente, adhibito pulvere Anthelmintico vivus Gliris pullus, quoad omnia membra perfectus, sed nudus adhuc, cum excrementis rejiceretur, qui integer adhuc in Museo nostro asservatur, & cum per integrum viveret diem, à singulis Dn. Studiosis, qui Collegium nostrum tum temporis frequentabant Anatomicum, non sine summa admiratione lustrabatur. Puer interim deposito hocce onere adhuc usque diem optime valet.

§. XXI.

Interim tamen *aberrationi*, ut ante dictum, à suâ perfectione ansam præbere affectus externos & extraordinarios, nemo facile negabit, cum insolita sensus tam internos quam externos fortius feriant, & juxta effatum DIVI nostri SENIS insveta sveltis sint deteriora, fieri posse credimus, quod per fortuitam & irregularem spirituum agitationem *Idea* rerum subitaneo occurso matri terrorem incutientium cerebro impressa, ad uterum postea transferatur, ac genituræ certas sibi que similes imprimat notas: Si v. g. forex, glis & hisce simile quippiam inopinato corpori mulieris insilit, aut cerasa, fraga, similisque farinæ fructus, nemine advertente, eidem incidunt, characterem novum-fœtus confestim recipit: cum hisce quadrat exemplum mulieris, cujus mentionem facit LEVIN. LEMNIUS *de Occult. Natur. Miracul. L. I. c. 4.* hæc cum extralegitimum thorum se alteri prostituisset, metuens, ne inopinato subitoque mariti interventu opprimeretur, exactis novem mensibus infantem enixa est, non Adulteri, cujus furtivo usa erat concubitu, sed absentis Mariti, quem metuebat, prorsus similem.

§. XXII.

Errat itaque *Idea* Matris culpa magis quam Genitoris; hujus enim vis imaginativa in ipso tantummodo valet veneris conflictu, illa vero factis jam induciis, toto formationis tempore *idealiter* peccare atque *errare* potest: nam quoties extraordinaria aut fortuito apparentia objecta sensuum externorum movent organa, tali mox speciali motu spirituum animalium tractus, qui per nervum ad organum istud devehitur, percussione modo commovetur,
ita ut

ita ut similis exactè motus, atqve in externo organo erat concitatus, & Spiritibus impressus, ad cerebrum usque ejusque compagem fibrosam; eo in loco, quo nervorum ad partes [quasvis allegatorum est principium sive origo, continuetur, ubi mens sive anima rationalis, motus huius specialis occasione & quasi intuitu, specialem sibi format *Ideam*, sive conceptum representantem exactè objecti externi factam impressionem, ut ingeniosè pro more docet B. DN. ETTMÜLLER in *Medic. Theor. & Prax. General. Instruct. P. I. c. 21.* Quamvis autem *Idea* ejusmodi *mentalis*, sibi relicta, stultescere sit nescia, juxta HELMONT. *Tr. de Concept. fol. 370.* Quinimò & mentis actiones corpori immediatè non alligentur, neque ad ejus essentiam, quatenus corpus est; quicquam conferant, altera tamen alteram ad agendum excitat, & in agendo sequitur, ob quam cognationem fieri non potest, quin ex *mentalibus Ideis* fiant *Archeales*, quæ ut postea consensum mentis non optant, ita nec expectant, suntque tunc *Monstrorum* feracissimæ, & quidem hoc, ut diximus, à parte Matris præsertim, cum multo vehementius imaginentur foeminæ quam viri, quod non adeò fortiter phantasmatum furiis ac *Idearum* operationibus valeant resistere, ut verum sit, quod vulgò dici solet: *Mulieres aut afflictim amare, aut crudeliter odisse, mediocriter non affici.*

S. XXIII.

Quod cum ita sit, objectum illud, quod tam altas in mente egit radices, ab *Archeo* Mentis cum corpore vinculo intermedio, defertur cum sanguine, appropriato ejus vehiculo in Uterum, ubi particulas nutritioni embryonis dicatas tam callide disponit atqve torquet, ut sese conceptæ *Idea* accomodent modulo: hinc fieri, inquit DAVID van der Wecfe l. c. p. 282. quod integras sæpè Nationes solo aspectu à se invicem discernere valeamus; Italos nempe à Gallis, hos ab Hispanis, atqve hos ab Hebræis: cum enim singularum nationum prægnantes Mulieres quotidie non nisi propriæ Gentis viros intueantur, horumqve speciem fortius haustam sibi imaginentur, foetus enituntur omninò similes. Ita ex conversatione cum pecore REBECCAM peperisse ESAVUM שַׂרָה בְּחֵרָה vult DN. M. NICOL. BENED. PASCH. in *Diss. An Esau fuerit Monstrum.* S. 13. quamvis dissimilem JACOBI

& ESAVI formam, diversis uteri partibus non eandem habentis constitutionem, tribuat JOH. MARCUS MARCI A KRONLAND in *Philosoph. vet. restit. P. II. S. IV. p. 130.* Quidni igitur imago rei auribus vel visu perceptæ insolita, quam toto sæpius formationis tempore quasi intuetur, in foetu postea non appareret? refert enim THOM. BARTHOLINUS *Cent. III. Ep. 40.* de Muliere quâdam Hassnienfi, quod in Obsidione crebris tormentorum bombis auditis visisque globulis ignitis, per urbem obsessam volitantibus, territa, similes globulos Infanti impresserit. BALDUIN. RONSÆUS *Lib. de Primord. Homin. c. 10.* narrat, Goudæ in Hollandiâ Mulierem quâdam greges Gallinarum Indicarum videntem, sic fuisse consternatam, ut foetum postea pepererit, habentem faciem multis excrescentiis carnosus varii coloris ad Galli Indici instar deturpatam. Horrendum dictum est, quod literis consignatum reliquit WEINRICH. *de Ort. Monstr. c. 17.* de quâdam Muliere gravida, quæ cum Maritum vidisset in pectore lethaliter vulneratum, foetum postea edidit, qui pectus apertum, & rimam manifestam habuit, eâ parte, quâ Maritus erat vulneratus.

§. XXIV.

Tam graviter peccare *Ideam* non ipso tantummodo durante formationis tempore, sed & transactio jam eodem observant Doctores: refert enim B. SPERLING. *de format. Homin. in Utero p. 105.* ex CORNEL. GEMMA, gravidam quâdam, cum partus instaret tempus, maritum stricto gladio insecutum, frontique ejus plagas ac vulnera minitatum esse, ipsamque post prolem peperisse, ingens in fronte gerentem vulnus, è quo sanguis perfluxerit tam abundè, ut sisti nequiverit, usque dum malitiam parentis morte lueret innocens partus. Historiæ veritatem confirmat exemplum, quod affert JOH. JAC. WALDSCHMID in *Dissert. de Caus. Part. Monstros. ex Authore Pansoph. Enchiretic. p. 277.* quod Mulier quâdam foetum grandiusculum utero gerens, dum semel decapitari quendam hominem vidisset, valdè territa in deliquium ceciderit, & enixa sit paulo post infantem, cui caput erat abscissum, ita ut ex utero non exiverit, nec mulier in utero molestiam ullam habuerit, signo certo, quod caput infantis in matrice non restiterit. Causæ hujus *Portenti* difficultatem fatetur quidem Author, vi autem

Doctrinæ

Doctrinæ suæ facile id fieri potuisse, addit, nam cum Mulier, inquit,
“Gerens utero in decapitatione facta à Carnifice, forsan summam
“habens complacentiam, desiderium (sicut prægnantibus nihil novi,
“absurdissima appetere) accepit aliquid decapitandi, etiam fortè
“sui proprii in utero infantis, quare in tali desiderio, *Ideam* gladii
“fabricavit, & tangens uterum quo loco caput infantis erat, manu
“*Ideam* gladialem collo infantis incussit, & caput demessuit, sicuti,
“si pirum desiderasset, & piri formam collo apposuisset. quod
“verò caput absciderit, non verò gladii formam expresserit, ratio
“est, quia desiderium erat infantis caput abscindendi: idcirco gla-
“dialis *Idea* non solum ad collum, sed per collum transierit.
“Quod verò caput nullibi repertum, id quoque Matris phanta-
“siæ adscribi potest, quæ caput à se decollatum infantis nolens
“reperiri, nec nosci cujus cadaver esset, caput in Athomos resol-
“vit, quæ cum lochiis mulieris exierunt.

§. XXV.

Nos quamvis ineffabilem in *Ideis* formandis vim gravidis
demere nequeamus, non tamen in assertum hujus Authoris jurare
cupimus, rei interim gestæ veritati non contradicentes: similem
enim huic accepimus ex relatione *Magnifici ac Summè Reverendi*
Dn. Soceri nostri, de fœmina delicatula Berolinensi, cujus Maritus
sociæ suavissimæ amore ductus, familiariter haud rarò cum eadem
cavillari ac joculari solebat; contigit autem, quod ultimo gesta-
tionis tempore comprehensæ ex abrupto manus amputationem cum
cultello post cœnam simularet, & nescio quo fato eandem impru-
dentius vulneraret, quo perterrita, chyrurgicam quidem patienter
tulit operam misera, at, paulò post infantis eadem parte mutilati,
mæstissima fiebat Mater. similis sortis exempla refert JOH.
BAPT. van HELMONT. *Tr. de Inject. Materialib.* sed modum
à priori indemonstrabilem lubens agnoscit, cum enim juxta ejus
mentem nemo scire possit, quo pacto impressa seminibus *Idea*
figuret, dirigat atque disponat sua constituta; ideò à posteriori
idem venatur: & sane in re tam ardua doctam profiteri ignoran-
tiam (est enim juxta SCALIGERUM *Exercitat. 307. Sect. 29.*
erudita inscitia, quædam ignorare, æque ac in Theologicis Sapi-
entiæ pars est, quædam æquo animo nescire) satius esse puto
quam

quam ἀλογία proferre : Interim tamen *Ideale* terroris spectrum tyrannidem quoque suam in partum, non tantummodo membra miserè distorquendo, sed & penitus eadem abolendo, exercere, ex funesto judicamus effectu.

§. XXVI.

Si conjecturæ locus est concedendus, *Archeo* corpora in se absorbenti, ut fiant quasi Spiritus, hoc imputandum cum HELMONTIO, diceremus, exemplo aquæ fortis quæ suo Spiritu æs, ferrum vel argentum manantia in sui natura opaca facit ita transparentia, ut videri nequeant, & per chartam emporeticam, quæ alias ne tenuissimum pulverem transmittit, Metallum adhuc in specie Metalli essentialiter manens, traducit, non, addit, quod similitudo penetrationis dimensionum cum proposito metalli exemplo uniformiter quadret. “DEUSINGIUS ingeniosè putat, quod mutata partis formatæ dispositione per vires imaginationis, mediantibus spiritibus ac humoribus sensim deinceps spirituum ac sanguinis in eam partem influxu, pars ipsa resolvatur, & dissolubilis reddatur, ut continuo sanguinis ac spirituum impetu eadem imaginatione Matris tracta, sensim dissipetur ac resolvatur, susceptis continuo Atomis dissolutis in venas ipsas, iisdemque refluxo sanguini permixtis, aut partim cum aliis corporibus diffatis. Hoc autem eò saltim in casu, ubi post conceptam Matris *Ideam* amplius commorandi in Utero tempus foetui conceditur, locum habere posse, non autem si brevi post, & citò partium in foetu fit privatio, & annihilatio, cum mutatio talis moram requirat, rectè judicat JOH. CHRISTIAN. FROMMANN *de Fascinat. Magic. L. III. P. X. S. II. c. 5. §. 85. p. 1042.*

§. XXVII.

Quocumque autem *Archens* in fabricandis *Ideis* exoticis rapiatur furore, haud rarò tamen maternæ manus directioni præstat obsequium, ita ut conceptus characterismus certo alicui applicetur membro, ut huic non alteri fiat proprius, cujus asserti infinita possemus afferre exempla, nisi cuivis essent obvia; unicū tamen, idque domesticum, quod B. Matri nostræ obtigit, referam : hæc utero gerens per fenestram vidit vetulam delirantem, dissolutaque canitie per plateas errantem, cujus facie horrenda, perterrita re-
troce-

trocedebat Mater, & nescio quo fato caput fricabat digito; exacto
 gestationis tempore puellum felicissimo edidit partu, cujus capil-
 lus eâ parte, quam fricaverat digito Genitrix, canitiem Vetulæ ex-
 actè repræsentabat: quemadmodum enim manus plurimarum
 actionum externarum est instrumentum, & voluntatis executivum
 medium, ut ingeniosè docet *Excell. Dn. D. GERDESIUS, l. c.*
c. 4. §. 13. ita sollicitudo, descendens ad manum, quasi ad de-
 fensionem sui foetus, conceptam *Ideam* recipit, pergitque ulterius
 in foetum, vid. HELMONT. *Tr. de Ideis Morbos.* Quando au-
 tem sibi relinquitur *Archeus*, conceptam *Ideam* tamdiu fluctua-
 bundè movet, usq; dum commodum expressioni elegerit locum,
 quanquam & interdum in hocce quoq; erret executionis puncto: ut
 quod sinistro v. g. imprimere debuisset lateri, dexterum recipiat; nar-
 ravitenim nobis hujus asserti exemplum nuper amicus, quo familia-
 riter satis utimur, de quâdam suarum agnatarum, quæ ultimo iti-
 dem gestationis tempore, ictui mariti quo petulantiam cujusdam
 filiorum suorum coërcere volebat, ex improvviso occurrendo, bra-
 chio sinistro eundem excepit, cujus stigma filia mox prognata, &
 felici adhuc in thoro degens, ad hoc usq; tempus in brachio ad-
 versi lateris gestat.

§. XXVIII.

Non minus rei avidius desideratæ *Ideam* graviter in foetus for-
 matione errare, infinita passim docent exempla, inter quæ memo-
 ratu dignum est, quod habet MARCUS MARCI A KRONLAND
 de foeminâ gravidâ insigni desiderio agrestis pomi affecta, cujus
 autem ut noxii commestio cum à Marito assidente interdiceretur,
 in moerorem incidit insignem, ut à continuâ & forti pomi deside-
 rati meditatione sibi nec temperare, nec ab aliis selectissima etiam
 poma offerentibus, revocari posset. Hæc demum enixa foetum
 est, è cujus malâ pendebat pomum, proprio adhærens petiolo, cum
 crescente foetu incrementum sumens, figurâ & colore pomum ex-
 actè referens: si autem phantasia prægnantis desiderio insatiabili
 excitata, adeò errare potest, ut vel res inanimatas ac vegetabilia
 repræsentantes *Ideas* possit conceptui humano imprimere, quidni
Seminalem Ideam in iis quæ ipsi magis sunt analogæ (ut sunt Re-
 gni Animalis species diversæ) errare cogeret? refert DAVID

"van der Beeke l. c. p. 290. ex eodem MARCO MARCI de Mer-
 "cenariâ quâdam Muliere gravidâ, quæ Mensæ accumbens, avi-
 "dius comedebat de capite carpionis piscis; accedens coqva, quod
 "hanc partem sibi destinârat, graviter increpat foeminam, ut pu-
 "dore suffusa in patinam rejiceret, ambesum piscem: & quamvis
 "ab adstantibus, foeminam Utero gerere cogitantibus, ad caput car-
 "pionis comedendum, postea invitaretur, pudor tamen dolorisq;
 "acerbitas ipsam de mensa surgere fecerunt, surrexit ergo incœ-
 "nata, continuas lacrymas fundens; cubitoq; capiti admoto (uti
 "mœsti solent) nil nisi piscem illum meditabatur, infelicitissimo
 "certè eventu; peperit namq; infantem, cujus caput non prorsus
 "humanum, sed ex dimidio piscem referebat, illâ parte, quæ
 "cubito matre innitente fuerat compressa, ita ut ipsum quoque
 "Os in duo semiora, inq; partes humano ori; & quale carpionum
 "est, assimiles divideretur: quinimò & color cyaneus, & squa-
 "marum similitudo eidem inessent. Hocce malum Mulieribus
 Belgicæ Nationis ptæprimis esse familiare, asserit LEVIN. LEM-
 NIUS l. c. c. 5. Hujus farinæ plura exempla habent THOMAS
 FIENUS *Tr. de Virib. Imaginat.* JOH. BAPT. PORT. *Mag. Na-*
tural. L. II. c. 19. CASP. EBELIUS, *Tr. Physic. de Virib. Im-*
aginat. Sect. 4. th. 1. p. 45. seqq. PHILIPP. CAMERARIUS. *Hor.*
subcisiv. Cent. I. c. 54. LIBAV. *P. II. Singul. p. 151.* JONSTON.
Admirand. Homin. c. 7. A. 1. §. 2. SCHENCK. *Observ. rar. L. IV.*
Obs. 129. JOH. PETR. ALBRECHT in *Ephem. Physico-Medic. Germ.*
A. VI. Obs. XIV. D. JOH. LAURENT. FEHR *Obs. XXX.* JOH.
 BURGIUS *Obs. LVIII.* D. FRIDERIC. WILHELM. CLAUDE-
 RUS *Obs. CXC.* JOH. BAPT. van HELMONT. *Tr. de Ideis*
Morb. &c. &c.

J. XXIX.

Pari modo & Matris gestantis fastidium rei declinatæ charac-
 res atq; Ideam ope Archei inurit, idque partim aperte, unde cum
 PARÆO & BELLANGERIO putat LICETUS l. c. c. 84.
 MAGDALENAM SORBUCATAM febre divexatam, mulier-
 culæ consilio rana viva manus palmæ affixa tamdiu detinenda,
 usque dum immoreretur parti, eoque habitu viri amplexus exer-
 centem, atque inde concipientem, suo tempore peperisse puerum,
 facie

facie ranali : partim *teclè*, ut *Idea* rei Matris appetitui contrariæ degeneret in nævum animi, cujus exempla passim habent naturæ curiosi in Ephemeridib. ut & SCHOTTUS *Physic. Curios. L. III. c. 27.* Ne dicam, quod nec in somno ab opere desistat *Idearum* furia, dum dormienti formosæ objecta mulieris Imago tentigo non tantum excitatur, transmissa ad penem multo spiritu genitore, ut loquitur RIOLANUS *l. c. c. 3.* sed & fœminæ rei in somno vitæ *Ideam*, de quâ vigilantes nunquam cogitarunt, in foetu deinceps expressam deplorant. §. XXX.

Relativam ejusmodi Sympathiam hæmaphosi Matris tribuunt illi, qui propriam foetui sangvificationem, nescio quo jure, dene-
gant; at si præter institutum ac modum fusius antea jam demon-
stratum, materiæ aliqua deferenda esset functio, Chylosæ potius
portioni, *Idea* conceptæ modulo sese accommodanti, eandem com-
mitteremus, cum eadem quæ format virtus in Utero sit & quæ
nutrit, ita ut nutritio sit etiam generatio quædam & *Idea* explica-
tio, docente DAVIDE van der Wecke *l. c. p. 219.* Si itaq; semen
juxta probatissimorum Anatomicorum assertum est portio sangvinis
chylosa, quemadmodum Dominis Auditoribus nostris notum est
ex *Prælect. nostr. de Format. Fœt. in Uter. c. 3.* sequitur, quod eidem
quoque *Idea* hominis insit, quæ tam variè alterata à perfectione suâ
aberrat : quis itaque relativam hancce sympathiam substantiæ,
quæ & Infantem extra uterum nutrit, non tribueret? præsertim
cum quotidie observemus, quod *Idea* terroris quò corripitur nu-
trix, mediante Lacte, ut portione chylosa, transferatur in infan-
tem, motibus convulsivis tyrannidem motricis funesto exemplo decla-
rantem.

Quantacunque autem demum *Idearum* conceptarum vis sit,
nunquam tamen perfraderi nos patiemur, o quasi solâ earum
virtute absque decenti compressione virili concipere possit Mulier,
ut vult VALLESIUS *Controvers. Medic. & Philosophic. c. 7.*
Quamvis fœmellas solummodo, easque maximè debiles, addat, quasi
sequeior sexus esset, & à societate humana excludendus, nam cum
in utroq; semine integra hominis contineatur *Idea*, quarum altera

alterius sæpe corrigit defectus, neutrum sibi soli ad generationem sufficere potest; unde haud immerito falsam pronunciamus sententiam latam A. M. DC. XXXVII. à PARLAMENTO GRATIONAPOLITANO in favorem MAGDALENÆ AIGUEMERIANÆ, ne familiæ illi illustri ignominia macula inureretur, dum quarto post Mariti HIERON. AUGUST. DE MONTLEON (qui cum Cardinale VALETTO in Alsatia abfuerat, ibidemque obierat) absentiam Anno natum, legitimum paternorum bonorum hæredem constituit, ab imperitis enim Medicis & Obstetricibus persuasum erat, filium sola imaginationis vi fuisse conceptum; cuius fidem suspectam reddidit D. DE LORD. *Medic. Profess. Monsp.* rogatus à Nobili de MONTRABBE Præsidi Parlamenti Grationapolitani, quia, ait, Mulier sine virili semine concipere non potest, omnium Medicorum consensu, nam sexuum discrimen foret supervacaneum, si Mulier sola sufficeret ad Generationem; quinimò & Sorbona sententiam hanc reformavit, causata eandem non tantum palliandis quibusdam impuris amplexibus posse conducere, sed & in ignominiam sanctissimæ conceptionis Christi cessuram, vid. ERASM. FRANCISC. *Just. Schaub. P. II. Sect. VI. p. 1213. seqq.* LAMZWEERD. *l. c. c. 20.* DEUSING. *Histor. fœt. extra Uter. Genit. Sect. II. §. 33.* DAVID van der Beeck *l. c. p. 289. in not.* THOM. BARTHOLIN. *Hist. Rar. n. 61. Cent. VI.* PAUL. ZACCH. *Qu. M. L. L. III. Tit. 1. Qu. 8.* JOH. CHRISTOPH. BECMANN. *Doctr. Moral c. 2. §. 6. Sc. Sc.* Non temerè hinc quoque deridet AVERRHOIS assertum, quod ætatis floridæ foeminam ex balneo, cui semen infusum virile, concepisse affirmat SIMBALDUS *L. I. c. 14. Genethr. Conf.* LAMZWEERDE *l. c. c. 21.* PAUL. ZACCH. *Consil. XLII.* Ova autem foeminea perfectum semen continentia stimulo quodam libidinis ad Uterum delabi, citra congressum cum Mare, & intumescere quoque, foetum autem fieri nullum, sed tum ut in Gallinis in ova subventanea, in foeminis in molas labire, cum expertissimis Hysterotomicis lubenter credimus.

§. XXXII.

Quemadmodum autem illi in excessu peccant, sic nescio quâ fretus ratione firmâ, à Physicorum assertis, ratione pariter ac experientia jam comprobatis, deficiat PAUL. ZACCHIAS *l. c. L. VII.*

Tit. I.

Tu. I. Qv. 2. fol. 576. seq. afferens imaginationem omnino à numero causarum Monstrificarum esse eliminandam, cum enim, in-
 "qvit, varia sint Monstrorum genera, & *Monstrum* sit, quid præ-
 "ter Naturam & per accidens ita genitum, non possunt omnia ad
 "unam eandemque causam reduci, sed necesse est, unum quodq;
 "genus habere suam adæquatam & proportionatam causam: &
 "licet plerumq; *Monstra* talia generentur ex parte seminum, tamen
 "ipsa semina non semper eodem modo sunt disposita. Defectus
 "ergo & superabundantia membrorum in *Monstris*, non aliam potest
 "habere causam, quam defectum aut superabundantiam seminum.
 "Tortuositas monstrosa à Mulieris inconcinno decubitu, aut ab
 "inconcinuitate in actu ipso coitus dependentiam habet. Men-
 "brorum mutatus situs ex seminum & Cyematis ipsius, vel efflu-
 "xionis trepidatione, & concussione originem ducet. Figura in
 "maximè extraneas figuras degenerans, seminum sanguinisq; alien-
 "tis vitium insigne denotabit. Degeneratio in alteram speciem,
 "miscellam diversorum specie seminum monstrabit. Maculas
 "quasdam, si libet, ad imaginationem refer, ego ad sanguinis
 "vitium referrem, & sic de singulis cogitandum, Quinimò ruere
 "putat Axioma illud omni veritate verius, quod *omne generans*
generet sibi simile. quoniam imaginatio mille phantasmatis de mo-
 "mento ad momentum occupatur *l. c. L. I. Tu. 5. Qv. 2. f. 140.*
 "cumque juxta FRRNEL. *L. I. Physiol. c. 3.* facultates omnes ac
 "singulæ in animali & in homine maximè sint ad certam operatio-
 "nem, & non ad expellendum aut assimilandum &c. Imaginatio-
 "nem ut facultatem animalem non posse concurrere in operatio-
 "bus formatricis, quæ est facultas naturalis, cum quâ nullam ha-
 "beret convenientiam &c. &c. quis enim vellet omnes ejus exami-
 "nare rationes, pro dethronandis Imaginationis viribus, quas ha-
 "bet *l. c. Consil. XXII. LXI.* & passim alibi.

XXXIII.

Difficilem, fateor, assensum meretur, quod merum Ens rati-
 onis fiat ens Spirituale seminale, potensq; ad perpetrandum res
 magni momenti; virtute sigillifera *Ideas* non tantummodo formans,
 sed & in Spiritu vitali characterizans, ut fusius docet JOH. BAPT.
 van HELMONT. *Tr. de Ideis Morbos.* cum tamen modum supra

jam satis inculcaverimus, non quidem pro argumen-
 ti sublimi-
 tate, sed pro spatii ac temporis ratione, ad id non agimus, nec
 novis argumentis contra manes tanti viri insurgimus; multo
 minus *monstrorum* adornare catalogum, aut omnes vel vulgo sal-
 tim notas examinare causas, instituimus, cum ante nos feliciori
 cum successu id fecerint, FORTUN. LICETUS; MARTIN.
 WEINRICH. JOH. GEORG. SCHENCK. ULYSSES ALDRO-
 VANDUS, JOH. JAC. WALDSCHMID. JOH. RIOLAN.
 THOM. BARTHOLIN. CASP. SCHOTT. & alii non levioris
 notæ viri; sed quid *Idea* valeat in *Monstrum* generatione, brevi-
 bus quantum fieri potuit, juxta Neotericorum mentem demon-
 strare animus fuit: si enim singula notatu digna huic materiæ
 jungere voluissemus, in volumen excrevisset schediasma Academi-
 cum: & si dicendum cur *Idea errantis* titulo usi simus, ad imitationem
Eccell. Dn. D. GERDESII elegantem Dissertationem de *IDEA ER-*
RANTE ac FURIBUNDA in HYDROPHOBIA conspicua ROSTO-
CHII Respondente Dn. HENRIC. ANHALD. publico Eruditorum
 examini, omnium cum applausu exponentis, hoc factum esse, in-
 genuè fatemur: cujus Authoritate & electione quoque ante aliquot
 annos de *IDEA ERRANTE in ECSTASI sive ENTHUSIASMO*
conspicua Disputationis nostræ inauguralis inscriptio erat, occasi-
 onem suppeditante JOH. BART. van HELMONT. *Tr. Demens*
Idea; hujus enim furorem nusquam magis conspicimus efficacem,
 quam in *Monstrorum* Generatione.

§. XXXIV. Quoniam autem sententia nostra circa arduam hancce mate-
 riam ab occultæ qualitatis ergastulo, ignorantia veterum asylo,
 vi rationis sanæ liberatam, distracta paululum fortassis videri pos-
 set, quod Auctores quosdam allegaverimus, quorum rationes
 partim fuimus secuti, partim verò illa, quantum fieri potuit, mode-
 stia, declinavimus, mentem nostram breviter ac succinctè jam
 exprimere constituimus.

§. XXXV. Dicimus proinde, quod omnis generatio in œconomia ani-
 mali præsupponat decentem utriusque sexus copulam carnalem,
 mediante quâ materia seminalis, certa subjecti *Imaginis* impræ-
 gnata,

gnata, in uterum, formationis futuræ receptaculum, infunditur, ita ut non totum illud quantum, sed particula illa spiritali aura ideificata, muliebre corpus perreptet, ac postmodum in ovarium, conceptionis officinam deferatur; ubi sese utriusq; *Idea* invicem evolvunt, ut exinde necessario exfurgat tertium, Genitoribus quoad minima quoque simile.

§. XXXVI.

Hæc *Idea* ratione sedis, *seminalis* vocatur, cui ut subiecto quasi inhæret, eidemq; ita propria est, ut Taurus nunquam generet Asinum, nec homo Leonem, sed foetum Genitoribus suis tam exactè similem, ut non corporis tantum, sed & animi sæpius nævos vel minimos exprimat, nisi eadem ab aliâ aliquâ *Ideâ* ab extra adventante, quam *objectivam* vocamus, depravetur: & hæc est, partim *mentalis*, quæ alienas sibi fingere potest *Ideas*, partim verò *archealis*, quæ ex *Ideis* rerum insolitarum sensibus sese repræsentantibus externis formatur, ac vocari solet *Idearum* mentalium portitor, cum *Ideas* à mente conceptas deportet ad Uterum, ibidemq; *Ideam* *seminalem* ad sui similitudinem disponat: hocq; *Idearum* trifolium in *Monstrorum* Generatione concurrat, ita ut *Mentalis*, ac *Archealis*, moraliter & remotè, sive mediatè *seminalis* verò physice & propriè sive immediatè errent atque peccent.

§. XXXVII.

In humano semine cum sint perfectæ omnium illarum partium *Ideæ*, quas postea in homine producto observamus, ita ut si docente JOH. MARCO MARCI, liceret nobis corporis æquè ac mentis oculis idem inspicere, videremus certè in illo sensibiles satis signaturas, radicales *Ideas* & essentielles adumbratas, sive integram humani corporis *Ideam*, adeò ut ex hoccè semine corpus organicum hominis, originali, ut ita dicam, quoad minima simile, exfurgeret, ac per consequens Parens claudus aut monocolus simile sui, aut semper masculos generaret, nisi & in ovariis uxoris latitaret itidem ejusdem originis ac conditionis *Idea*, quoad vehiculum tamen differens, quarum altera alteram evolvendo, defectus sensibiles sæpius corrigit, aut occultat, usq; dum levi accedente occasione, *Idealis* nævus sese manifestat, ut nonnullis exemplis docet Excell. Dn. D. GERDES. l. c. c. 4. §. 8.

§. XXXVIII. Præ-

Prægnantium *Idea* quamvis ipsa cæli impræssione fortior sit, ut vult MARCUS MARCI *Phil. Vet. restit. S. IV.* & in *Pica*, affectu gravidis familiari, infinitis erret modis (cujus inauditum habet exemplum CHRISTIAN. FRANCISC. PAULIN. in *Observ. Medic-Physic. N. 20.* qui vidisse se affirmat *Harsfordii* ad Moenum "in Diæces. *Herbipolensi*, Rusticam quandam mulierem gravidam, quæ maritum ad nundinas anniversarias comitans, de vario suo appetitu mira referebat. Quorum colonus pertæsus, dixit fortè: "En! Aente / friß einen Dreck. Paulò post hic solutis braccis cumulum in gramine fumantem fecit, & discessit. Mulier idem simulans, sordidissimas viri feces adhuc calidas (de exsiccatis enim exemplum habet BORELL. C. IV. *Obs. 2.*) summo cum delectamento ingerit, vitumq; insequitur. Qui tandem retrospecti-ens, odoremq; plane stercoreum admirans, reliquias jentaculi adhuc aliquas in facie conjugis deprehendit, dicens: Aente / was ist das? fatetur: increpat ille foetidum appetitum. Placatus demum à Muliere conticuit.) Non tamen in omnibus subjectis *Idealis* furia æque altas agit radices; si enim quælibet harum capax esset *Ideam* reformandi *seminalem*, quot, quæso, *Monstra* quotidiè non fierent?

Vitent interim, Auctor essem, delicatulae, horribiles rerum aspectus, aut si quid horum ex improvviso acciderit, non statim, ex causa supra allatâ, quovis se signent loco; vertant, potius oculorum aciem in ea quæ pulchritudine ac venusta sese commendant forma, quo conceptam exinde *Ideam*, tanquam sigillum quoddam, foetui, quem fovant in utero, non frustraneo imprimant eventu. si autem *Idea* vim in gravidâ sentit Medicus rationalis, *Ideam* *Ideâ* suffocet, ut notatu digno docet exemplo DAVID van der Beeke "l. c. p. 482. de Muliere quâdam prægnante, quæ Æthiopem inopinato videbat accedentem, & exhorrescebat tam inexpectato accessu, ut animi ferè deliquium pateretur. Ex adstantibus unus, quod insignem imaginationis vim probè perspectam haberet, prudenter metuebat, ne foetus aliquando edendus, nigra cute vestitus prodiret: Auctor itaq; erat adstantibus, ut lavarent foeminam totam, si fortè impressa foetui *Idea* superveniente aliâ, deleri posset.

"fet. Lavatur foemina, securaq; redditur, nullum jam post loti-
 "onem nigrorem, in foetu observatum iri. Peracto gestationis
 "tempore, foetus enixa est candidum quidem, ast nihilominus
 "aliquot in locis, impressi sibi nigroris vestigia ostendentem..
 "Observabantur enim omnium adhuc loca nigredine imbuta, quo
 "diligens lavantis manus non pertigerat; interstitia nempe digi-
 "torum, manuum aequae ac pedum, inguinis, ac praeter haec unus
 "in dorso locus, caeterae partes omnes, omni naevo liberae vide-
 "bantur &c. Quae insuper ex triplici Hygieae fonte solatio esse
 possunt pauperculis, ingeniose satis suppeditat *Excell. Dn. D.*
GERDES. l. c. Sect. II. Pract.

§. XL.

Cum autem in hominibus deprehendatur cogitationum velo-
 citas, animi celeritas, ingeniiqve varietas, hinc *Idearum* oritur
 multitudo ac differentia, ut proinde plura in genere hocce fiant
Monstra, quae non adeo frequenter generant bruta animantia, cum
 illa Veneris tantummodo operi sint intenta, nec alio phantasmam
 transferant: interim tamen *Ideas* objectivas organa sensorii feri-
 entes, eorum deportat *Archeus* in ovaria, in quibus *Idea seminalis*
 evolutionem expectat, sed turbata, hospitis figuram induit, quem-
 admodum non tantum Oves LABANIS sub manu ductione JACOBI
Gen. XXX. sed & alia infinita ferè docent exempla; inter quae no-
 tatu dignum est, quod habet D. ANDR. CLEYER. in *Ephem. Med.*
Medic. Physic. German. Decur. 2. A. I. MDC LXXII. Observ. 16.
 de Ovo Gallinaceo cum serpentis imagine in testâ; cui, tantus,
 addit, *naturae lusus etiam in reconditis animalium partibus, nempe*
uteris, ex subita animi perturbatione quandoq; imprimitur, quod forsitan
Gallinae nostrae ovum hoc Ophioides parturienti accidit, cum ei serpens
aliquis improvise & subito obviam profilierit: unde perturbata gallinae
imaginatio serpentis IDEAM, ovo ex suo ovario jam elabenti, attulerit,
eidemq; talem formam impresserit. Ne dicam quod passim hodie haud
 raro oves aut vituli nascantur turritis capitibus, foeminarum no-
 strarum ornatum, quem *fantangen* vocant, repraesentantibus, quas
Monstrosas capitum formas ornamentorum foemineorum vitia &
 pravitates monstrare sacris initiati persuadere connituntur, sed mihi
 nunquam, scribit JAC. BIRCHERODIUS ad TH. BARTHOLIN.

Centur. 3. Ep. LXXV. qvi, cum mille modorum à primis mundi cunabulis usitatorum species cogitem, nec cur una DEO sit alia invisior, dispiciam, imaginationi hæc aliaque ejus generis delicta tribuo.

§. XLI.

In *Minerali Regno* quoque; haud rarò instituto suo cadit natura, cum lapidibus atque gemmis non *monstruosas* tantummodo *formas*, sed & plantas, arbores, prata, sylvas, & regiones iisdem imprimit, quæ egregio sese sistunt spectaculo, v. g. *Lapides Florentini*, quales in Museo asservamus, integra Palatia, quin & Urbes superbissimas ostendunt. Quatuor lapidum genera in quibus plantarum & arborum icones, frugumque imagines à natura mirè depictæ conspiciuntur, recenset CASPAR. SCHOTTUS in *Physic. Curios. L. XII. c. 11. p. 1360.* & MATTH. TILINGIUS *Ephem. Medico-Physic. German. A. 2. Observ. LXVI.* quæ omnia P. ATHANASIUS KIRCHERUS olim in IMPERATI Museo celeberrimo vidit, & examinavit. vid. *Mund. Subterr. L. VIII. S. I. c. 9. p. 39. 40.* “Causam tribuit Pulveribus stirpium ac Plantarum in terra lapidescente existentium, quibus una cum calore exiguo quid spermatum adhuc inesse dicit, quod in lapide adhuc molli materiam nactum utcumque aptam ad plantam producendam, cum plantæ substantiam integram ex materiâ constituere non possit, præstare id, quod potest, h. e. solas in materia arborum herbarumque imagines plastica facultate, quæ seminali virtute adhuc aliquo modo inexistit, distingvere, adeoque Naturam h. m. cum plantam integram producere nequeat, producere id, quod potest, figuras nimirum plantarum. Conf. SCHOTT. *l. c.* An quadret hic modus, examinare superfedemus, cur verò ejusmodi vegetabilis *IDEA* rerum formosarum, marmorì Florentino adeò familiaris sit? in peculiari Schediasmate de *Ideis Ideas suffocantibus* propediem fortassis, bono cum DEO, fusius demonstrabimus.

§. XLII.

Quamvis autem multa sint in rerum natura, quæ captum nostrum transcendunt, non tamen statim contra naturam eadem contingere, adeò temerè asserendum, cum Auctor Naturæ DEUS T. O. M. eandem variè nonnunquam ludere permittat: quod etiam

etiam, quævis rarius, accidit quoque in vegetabilibus, utpote, quæ simpliciorum sortita sunt naturam, rudioraque corporum instrumenta, ac per consequens *Idea seminali* peccandi ansam facile adiungunt: facilius enim est, docente LICETO l. c. L. I. c. 5. errare in pangendis operibus variarum partium magno artificio invicem connexarum, uti sunt, animalium membra, paucas autem plantarum partes rectè componere, non ita est difficile: accidit tamen, ut diximus, nonnunquam, in pyro v. g. monstroso Anno 1644. circa finem Junii Stuttgartiæ in horto Aulico notabilis magnitudinis, facie humana insignito, cujus mentionem facit D. EBERHARD. GOCKELIUS in *Ephem. Medico-Physic. German. A. 6. Obs. CXXVII.* Plura hujus rei exempla habet CASP. SCHOTT. l. c. p. 1362. Talem Naturæ lusum, ex singulari DEI permissione ante aliquot annos in Svecia nostra Orthodoxa quoque contigisse notum est, cum venerandum CLEMENTISSIMI nostri REGIS nomen X. distinctè satis ex stirpe quâdam progerminaret, certissimo indicio, *Ideam* cultus, quo quilibet erga REGIAM suam MAJESTATEM ardet, rebus quoque inanimatis esse implantatam, ut in laudes ac pia quasi solvantur vota. Ultra natale solum eadem *Idea* omnium subditorum occupavit animos, nullo *Idearum* robore suffocanda. Statuam CLEMENTIÆ, SAPIENTIÆ & PIETATIS perennem ipsi erigit noster HELICON, & VIVAT, VIGEAT, FLOREAT voti nostri summa erit, ac Orationis devotissimæ

FINIS.

TE pietas ornat, Te grata Modestia gratum.
Efficit, & doctum docta Lycea probant.
Maeste isthoc studio: perge, & Te denique merces
Optima pro meritis hisce manebit honor.

Ita Per-Eximio Dn. Respondenti, Amico & Domesticæ suavisimo, congratulari & faustissima quævis apprecari volumus

NICOLAUS DASSOVIVS, SS. Th. D.

Prof. Ordin. Regii Consistorii Assessor,
& ad D. Mariæ Pastor.

Naturæ

Naturæ lapsus si quis monstrare valebit,
Conscius ille DEI, conscius artis erit:
His etenim natura subest, parere parata,
Ingenio cuncto, quod meliora parit.

*Laudato Clari Respondentis conatui certissimum
fructum bene ominatus monstrare voluit*

P R Æ S E S.

Quam monstri nihil intus alas †, cur monstra revelas,
HEISI, quæ rerum non amat ipsa parens?
Nempe potes causas aliis aperire latentis
Naturæ. Mentis laus ea multa tuæ.

† Vid. DES. ERASMI ROTERODAMI *Adagiorum Chiliades Chil. II.*
Centur. IV. fol. 485.

*Honori Doctis. DN. HEISII, Amici candidissimi,
duloxediassi facieb.*

M. CHRISTIANUS GAUBIUS/

Poëtic. ac Orator. Prof. Ordinar.

Ipsa suo natura gemens errore fatetur,
Quam sit perfecti nil habuisse datum.
HEISIUS è *monstris* divam delinquere discit,
Vertit & ad JOVAM se studiumque suum:
Naturæ tentans apicem libare subinde,
HEINSIUS, ingenio nominis, esse potest.

Auditori percharo ευφυνίας χ.

f.

M. BENJAMIN BOZEMNE/ P.P.

Facult. Philosoph. h. t. DECANUS.

Veritatem plerumque intercipit,
sive *idea* sive *opinio* errans.

Ipsa in partes discedente *Natura* atque *Arte*,
quis utrinque miretur *monstra* progenerari
hominum pariter & *sententiarum*?

Te verò felicem, amicissime HEISI, cui & erroris ratio constat,
& de *idea* errante *idea* non errat!

Libera verba, adstrictâ mente scrib.

M. JO. PHIL. PALTHENIUS, P.P.

✽(o)✽